

化州志

一
函
冊
函

焉庚寅致仕王太史狀公軀滿七尺而面如紫玉
坐立如山馬光祿論公溫恭而剛方不形直方而
毅果不見寬栗而通敏無跡云公著渭川集二卷
明華州刑部主事東公

公諱野字希孟思忠第五子宏治壬戌進士授陳
留知縣廉明稱于時嘗擒一大俠人尤以爲難能
縣北河水爲患公相視築堤民遂有沃野之利又
率士學古文辭乃陳留號罷弊邑至則風俗始改
觀云臺司交章論薦公爲御史以公年例不當爲
御史乃晉刑部主事卒

明華州高教授公

公諱仁正德癸酉以貢任成都府學教授博文崇義諸生蓋翕然歸其教爲時用之撫按命與修宋名臣言行錄蜀學士楊名齋延之授子弟易又羣鄉之子弟師事之丙子秋試門下中式者十三人連舉進士者五人時以公爲文教之盛也公族多脩文之士曰寧蒲州司訓曰文晉府教授曰岳河間教諭岳壽八十質直君子人也

明華州商水閻公

公諱宏字德裕宏治甲子舉人除商水知縣商水

地僻民刁官吏苟簡于政事公至奮張弛改觀縣治又縣水甚大公條陳治水云法至今行之鄰縣黃尹忌公譖之以還公行年九十不失色于人其得恂慄之師乎厥子孫赫奕公之道遠矣

明華州張新鄭公

公諱縉字正儀清寧里人宏治甲子舉人授新鄭知縣地半沙鹵荒穢不治民頗好訟公至縣勸課農事右善良懲奸佞而又均賦役民心漸孚其政越明辛巳世宗入繼大統道經新鄭比文武百執事以萬計縉措置有方事克以濟臺司者賢之王

午以來流寇逼境公設備治戎寇以不犯在縣甫
三載以母老疾歸養鄭人有去思碑弟紳子熙以
歲薦赴北雍而熙今司訓建始

明華州李輝縣公

公諱傑字民望舉人事親克孝仕爲汜水知縣方
嚴不阿後丁憂起復補輝縣知縣清廉愛民又出
奉金脩百泉書院以課士子之業院司以善政善
教稱之卒于官所著有蟬鳴集三卷

明華州毋大足公

公諱育字宗誠號西坡甘泉里人篤志好學初與

東九江石給舍王海門爲文會交乃三公某年同
舉于鄉公應宏治十六年歲薦遊大學居二年無
接飲于秦之縉紳者日閉戶讀書歸秦後正德二
年舉于鄉郡侯江珏雅重之以爲公之進取不可
量也公于世澹處無他好顧獨好琴月夕弄琴酒
灑有仙游之興後授大足知縣涉縣境以病卒

明華州監察御史東公

公諱郊字希宋思忠第四子正德辛未進士授平
陽府推官以決疑獄飛名憲臣凡七論薦授浙江
道監察御史歷有條陳中外愕愕巡按南畿桓善

鋤惡風裁尤著會中貴鹽席百艘謀鬻諸郡邑公
不可遂蒙譖謫潞州判官公乞休遂歸

明華州山東左叅政張公

公諱潛字用昭號西溪一號東谷子由岷州學舉
宏治丙辰進士授戶部主事考上上績改刑部主
事又改禮部主客司主事以名衍聖公歸授儀制
司員外郎擢精膳司郎中凡朝會大典克愼克襄
以賢擢廣平知府會盜起畿內不可撲滅公多方
捍禦郡民賴焉戰績已蒙欽賞錦綺之隆遂遷山
東布政司左叅政凡旬宣督餉之務忠清盡職續

紳賢之尋以疾告歸占籍華州故縣里卒公之爲人雅有古人才行兩全之稱比爲士時督學楊一清稱公與慶陽崆峒李孟陽洵陽伎陵張鳳翔爲關中三才子云所著有東谷詩集

明華州馬湖知府李公

公諱蘭字秀夫清寧里人正德丁丑進士授戶部主事以公賞軍宣大一毫不染餘銀散給軍士諸軍士感激奮戰至今稱之部議公清廉俾管理太倉復管易州保定倉復管密雲古北口糧又督理永平山海薊州等處之糧所至革弊樹績次第轉

員外郎郎中時稱公爲鐵郎中累蒙欽賞以賢出
知重慶府收恤鰥嫠振作士習又察民隱戢豪右
重慶稱治焉公乃直道不悅於部使者論調馬湖
府以督進皇木有功欽賜旌異乙未入覲致仕歸

明華州魏光化公

公諱傑字士英號前山舉人知光化縣性戇直專
務安民民有兄弟分居之後其弟能治業富者兄
嫉之仍告分居其弟懼因端陽節公子出游乃托
人邀飲賂之百金公子歸奉公公大駭異之明日
訊知乃詔之曰汝弟治富兄安忍嫉之汝兄獨貧

弟安忍不顧反以金賂我邪卽以金一半給弟一半付兄曰卽此汝弟贈汝矣諸臺司聞者甚禮敬公公治光化九年給文當赴部遂告致仕院司傳檄命縣學獎送公百姓泣留不得徧野號呼歸後公七十餘歲卒卒之日自銘其墓石曰我生靡哲有黍斯滅於乎此可以知公之賢矣

明華州工部郎中東公

公諱實字希大思恭之子也舉人授新河知縣新河畿內弊邑也地鹵瘠多盜民狡悍有積稅不完公至振起頽俗愛民彌盜蓋稱盡心遂有善政之

聲乃大行部使交薦之晉工部營繕司主事權木
于越歸陞郎中督木于湖陟降嶺嶂觸炎不自顧
愛以度良材竟感疾卒于岳州

明華州蒲江劉公

公諱邦正字兆吉十二歲補州學弟子員以歲貢
選爲通許縣丞佐理有方縣人稱慶值高寵尅地
方知縣段某惶懼失措憂鬱成疾公曰事誠在我
乃設策剿平高寵撫按忻賞奏聞遂擢曲陽知縣
曲陽素聞公乃孚公之政會聖駕南幸官民驚惶
公諭以事上之義隨宜供應又協濟金靈至于倉

州無不克濟獲科道薦調蒲江知縣以蒲江奸頑難治也公嚴正蒞之民罔不服嘉靖壬寅以老告歸子宅牧補郡學諸生渭北趙太守曰公進而能退翛然雲漢者也

明華州文學二焦公

公諱廷節字子約禪之孫也正德十年歲貢卒業北雍授霍州訓導越八年陞河津教諭甫一年丁內艱服闋補沙河教諭又八年告致仕歸里公天性剛方行已端謹居家能盡孝友在任恒恤貧生其歸里也不謁公門鄉飲不赴郡侯皆重之以爲

端士可以範云弟曰廷臣字守堅正德六年應貢授靈寶訓導丰采凝峻器度掀豁爲文博而能精屢試不第然又卒于靈寶豪傑之落落豈其數之不偶者邪

明華州廣平府通判趙公

公諱輔字君鄰舉人嘉靖丙戌授扶溝知縣縣故有大猾善結歡官吏因以買寵于上武斷于鄉者公禁渠私謁會有人告渠事者渠畏公亡者久之知公賢來見公據事分理不念舊惡渠遂化爲善人盡改其蠹鄉之事已丑公調靖樂靖樂之民累

歲不完稅事公詢知鄉民懼縣民負欠之厲已也
乃下令禁之母厲鄉民民應期完稅更相感激以
爲眞父母也公赴部考九載滿耆民百人赴部保
留之部尙書遂知公賢遷廣平通判開釋無辜上
下德之公偉丈夫美丰儀至今爲鄉人稱述云

明華州太平張公

公諱拱北以明經應歲貢選授經歷陞太平知縣
太平繁劇乃公以易直子諒之德臨之民孚其德
化訟簡而風淳久之則民間婚喪無不與公知者
民以爲張父能育養我也歸老以後家甚貧世之

論官者率求循良之政有循良而無超軼之薦者
豈亦偶值乎遇之弗淑邪

明華州代州楊公

公諱孟芳字時馨新庄里人舉人授平陽府推官
直道而行不避權要陞代州知州尤克近民間弊
乃懲豪右撫恤小民蓋有良牧之風公體貌雖魁
梧而天性瀟灑嚴正雖不阿而日日行歌其豪傑
也哉所著有南涯稿

明華州右長史王公

公諱堯弼字唐臣故縣里人舉人授孟津知縣負

通敏之才行惠柔之政民蓋歸之會縣城圯于河水詔下改建縣治公克襄改建縣治之事奉法不染晉戶部主事又以度支騰譽以賢拜徽府右長史值王不軌公知不能規也貞晦自保厥後亦不罪公之爲輔導也以疾卒于家所著有可山集

明華州南京大司成王公

公諱維楨字允寧嘉靖乙未進士選庶吉士三年授檢討甲辰會試爲同考官取士號稱得人公首薦瞿太史氏南北人士服之乙巳與脩會典已酉以九載考績晉脩撰庚戌會試復爲同考試官發

策詢士略曰今大同邊垣旣以底績而薊州一路
顧有遺謀自今作之西至宣府東抵山海爲邊千
二百里使幹濟之臣戮力經營患可少止是年秋
上采羣臣議特設總督大臣一人使專備遼薊其
議蓋自公發之冬十月會武舉試公爲主考官仰
天祝曰是安得徇國之人而收之以裨國用攤卷
品士必先謀識所進武弁亦多得人公燕居好觀
古今名臣經略凡關隘阨塞備禦疎密之詳皆能
歷歷指陳不俟按圖其用世意氣立談可知也辛
亥冬陞右春坊右諭德署南京翰林院事公念南